

**Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni §9 imm. 1 allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni meeqqat illugiimmik angajoqqaallit, tamarmik sulisimappata imaluunniit ilinniartuuppata, kommunep ulluunerani paaqqinniffiinut ulluuneranilu paarsisarfinnut utaqquisut allattorsimaffianni meeqqanut kisimiittunik angajoqqaalinnut sulisimappata imaluunniit ilinniartuuppata assigiimmik pineqarnissaat angujumallugu.**  
(Siumup Inatsisartunut ilaasortaataitai)

*Aamma*

**Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisip allanngortinneratigut qulakkeerneqassaaq, kalaallit nunani allani ilinniartut qitornaasa kommunip meeqqueriviutaanut ulluuneraniluunniit angerlarsimaffinni paaqqinnittarfinnut utaqqisunut allanut naleqqiullugu sallinngortinneqartalernissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu.**  
(Inatsisartunut ilaasortaq Malene Vahl Rasmussen, Demokraatit)

**Pillugit**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**Siunnersuutip aappassaanneerneqarnissaannut**

**ISUMALIUTISSIISSUTAA**

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq suliarinninnermini kingullermi uku inuttarai:

Inatsisartunut ilaasortaq Doris Jakobsen Jensen, Siumut, formand  
Inatsisartunut ilaasortaq Peter Olsen, Inuit Ataqaatigiit, næstformand

Inatsisartunut ilaasortaq Erik Jensen, Siumut  
Inatsisartunut ilaasortaq Nivi Olsen, Demokraatit  
Inatsisartunut ilaasortaq Sofia Geisler, Inuit Ataqatigiit

UKA2019-imi ulloq 15. oktober 2019 siullermeerinninnerup kingorna siunnersuutit ataatsimiititaliamit misissorneqarput.

## **1. Siunnersuutit imarisaat siunertaallu**

### **1.1 UPA2020/33**

kommunip ulluunerani paaqqinniffiitut ulluuneranilu paarsisarfinnut utaqquisut allattorsimaffianni eqimattat C aamma eqimattat D imminnut sanillersuunneqarnissaat siunnersuuteqartup siunnersuutikkut kissaatigaa. Tamatuma saniatigut siunnersuummi siunertarineqarpoq eqimattat E aamma F ataatsimoortinneqarnissaat tamannali siunnersuutip taasissutissartaanut ilaangilaq taamaattumillu siunnersuut ilusimisut isikkoqartillugu akuerineqassappat Naalakkersuisunut pissaaffiliissanani.

Inissamik agguaassinerup allaffissornikkut kommuninut suli pisariillisarneqarnissaa siunertarisamut naleqquttuusinnaammat aningaasaqarnikkut allaffissornikkullu oqartussanut kingunerisassaa pillugu siunnersuuteqartup siunnersuutigivaa. Uani ataatsimut katinneqarnissaat eqimattat e (meeqqat illugiinnik pilersuisullit, taakkunannga ataaseq suliffeqarluni imaluunniit ilinnartuulluni) aamma eqimattat f (meeqqat illugiinnik pilersuisullit allallu, suliffeqanngitsunik imaluunniit ilinniagaqanngitsunik angajoqqaallit). Aaqqiissut taanna tabel 1-imi 33a taaneqarpoq.

### **1.2 UPA2020/53**

Kalaallinut ilinniagaqartunut meerartalinnut ilinniareernerme kingorna nunatsinnut utertunut tulleriarinermut allattorsimaffiit pillugit malittarisassat allanngortinneqarnissaa siunnersuuteqartup siunnersuutikkut kissaatigaa. Taamaaliornikkut ilinniagaqartut taakku eqimattat pillugit malittarisassani tamani siulliutinneqassapput. Tamatumunnga piumasagaataavoq ilinniagaqartoq suliffeqarfimmi nunatsinniluunniit pisortaqarfimmi atsiorsimasumik atorfininnermut uppernarsaateqassasoq.

## **2. Apeqqutit**

Siunnersuutininik suliaqarnermut atatillugu ataatsimiititaliap ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq qinnuigisimavaa apeqqutit arlallit akineqarnissaannik. Apeqqutit Naalakkersuisullu akissuteqaataat ilanngussaq 1 aamma 2-tut isumaliutissiissummut matumunnga ilanngunneqarput.

### 3. Tusarniaaneq

Meeqqanut suli atualinngitsunut neqerooruteqarneq kommunip suliassaraa ulluinnarnilu kommuninit aqunneqarluni. Tamanna tunngavigalugu ataatsimiititaliap pisariaqartippaa siunnersuutit pillugit kommunit tusarniaaffigissallugit. Tamatumunnga atatillugu kommuninik tamanik tusarniaanermut akissutinik ataatsimiititaliaq pissarsisimavoq. Kommunit akissuteqaataannik misissuineq immikkoortoq 4.4-mi takuneqarsinnaavoq.

### 4. ataatsimiititaliap siunnersuutinik suliaqarnera

Meeqqat suli atualinngitsut pillugit inatsimmi § 9, imm. 1 qitiusumik alajangersagaavoq siunnersuutini tamani allanngortinneqarnissaa kissaatigineqartoq. Aalajangersakkami kommunit ulluunerani paaqqinnittarfinnut paarsisartunullu tulleriiarisarnerat pillugu aalajangersakkat takuneqarsinnaapput.

§ 9, imm. 1-4 ima allasimapput:

#### *Tulleriiarineq*

*§ 9. Kommunimi meeqqeriviit imaluunniit angerlarsimaffimmi paarsisarfiit inissaqalersillugit, kommunalbestyrelsi meeqqat utaqquisut akornanni toqqartuissaaq, kommunimi meeqqerivinnut imaluunniit angerlarsimaffimmi paarsisarfinnut naapertuuttumik ukiullit akornanni, ataani tulleriiarinissamik innersuussutit malillugit.*

*1) Ataatsimoortut a: Meeqqat - isumaginninnermut ataatsimiititaliamit innersuunneqartut - immikkut perorsaanikkut pisariaqartitsinertik pissutsilluunniit allat meeqqap inerikkiartorneranik ulorianartorsiortitsisinnaasut pissutigalugit.*

*2) Ataatsimoortut b: Meeqqat meeraaqqerivinniit kommunimiluunniit angerlarsimaffimmi paarsisarfinniit meeqqerivinnut ukiutik pissutigalugit nuuttussat.*

*3) Ataatsimoortut c: Meeqqat suliffeqartunik imaluunniit ilinniartunik kisermaajusunik pilersuisueqartut.*

*4) Ataatsimoortut d: Meeqqat pilersuisuisui tamarmik suliffeqartut imaluunniit tamarmik ilinniagaqartut.*

*5) Ataatsimoortut e: Meeqqat pilersuisuiusup aappaa suliffeqartoq imaluunniit angajoqqaap aappaa ilinniagaqartoq.*

*6) Ataatsimoortut f: Meeqqat pilersuisui allallu, tassunga ilanngullugit kisimiittut, tamarmik suliffeqanngitsut imaluunniit ilinniagaqartuunngitsut.*

*Imm. 2. Aappariit katinnikuunngikkaluarlutik aalajangersimasumik najugaqatigiittut, imaappoq aappariit minnerpaamik ukioq ataaseq*

*najugaqatigiissimasut, meeraat angajoqqaatut oqartussaasut imaluunniit meeqqamik pilersuisuiusut katissimasut meeraattut isigineqassapput.*

*Imm. 3. Kommunalbestyrelsip utaqqisut allassimaffianniit toqqartuinermini ilutigisaanik qularnaassavaa, meeqqeriviit ataasiakkaat meerartaasa - perorsaanikkut anguniagassat pissutigalugit - ukiumikkut naammaginartumik siammaassimanissaat, nviarsiaqqat nukappiaqqallu sapinngisamik amerlaqatigiinnissaat, aamma meeqqat immikkut ittumik pisariaqartitsisut imaluunniit tapersersorteqartut naammaginartumik siammaassimanissaat.*

*Imm. 4. Illoqarfigisap nunaqarfigisalluunniit iluani meeqqerivimmu allamut aatsaat nuuttoqarsinnaavoq, tamanna meeqqap atugarissaarnissaanik peqqissusaanillu imaluunniit angallassinikkut pissutsit ajornakusoornemannik pissuteqarpat.*

Erseqqissaatigineqassaaq siunnersuutit § 9 imm. 3-4-mut attuumassuteqanngimmata. Taamaaliornikkut kommunit sulii paaqqinnittarfinni meeqqat ukiumikkut assigiinngiaarnissaat qulakkeersinnaavaat aamma meeqqat immikkut pisariaqartitsisut imaluunniit tapersersortit siammarsinnaallugit. Tamatuma saniatigut meeqqat suaassusaasa agguaqatigiissinnerat assigiissaaq. Tamatumani UPA2020/33 imaluunniit UPA2020/53 akuerineqaraluarpataluunniit.

#### **4.1 Takussutissaasinnaasut**

Ataani allattukkat siunnersuutinik akuersinermi assigiinngitsunik takussutissiipput. Eqimattanik pingaarnersiunermini tulleriarinermi salliutitsinermik ingerlanneqartarpoq pingaarnerit qulliutillugit pingaarnerunngitsullu alliutillugit.

**Tabel 1: Siunnersuutip akuerineqarneragut takuneqarsinnaasut assigiinngitsut**

	Siunnersuutit akuerineqartut					
	Imm. 33	Imm. 33a <sup>1</sup>	Imm. 53	Imm. 33+53	Imm. 33a+53	Soqanngilaq
<b>Pingaarnersuinerit</b>	2	2	1	1	1	2
	3	3	2	2	2	3
	4+5	4+5	3	3	3	4
	6	6+7	4	4+5	4+5	5
	7		5	6	6+7	6
			6	7		7
			7			

***Eqimattat atii<sup>2</sup>***

**Eqimattat 1:** Ilinniartut pilersuisut Kalaallit Nunaata avataani ilinniareerlutik utertut meerartaat. Pilersuisut utimut nuunnerminni suliffeqarfimmi imaluunniit nunatsinni oqartussani atorfinissimanermit allagartaq atorsinnaasoq takutissavaat. (eqimattat NUTAAT)

**Eqimattat 2:** perorsaaniikkut pisariaqartitsineq imaluunniit allanik peqquteqarluni meeqqap ineriartorneranut navianartorsiorneq pissutigalugu isumaginninnermut ataatsimiititaliamit innersuunneqartut. (siornatigut eqitaat A-usimasoq)

**Eqimattat 3:** Meeqqat ukiutik pissutigalugit meeraaqqerivimmiit kommunimi paarsisartumut imaluunniit meeqqerivinnut nuunneqartut. (siornatigut eqitaat B-usimasoq)

**Eqimattat 4:** Meeqqat pilersuisumik ataasiinnarmik suliffeqartumik imaluunniit ilinniagaqartumik pilersorneqartut. (siornatigut eqitaat C-usimasoq)

**Eqimattat 5:** Meeqqat pilersuisunik illugiinnik suliffeqartunik imaluunniit ilinniagaqartunik pilersorneqartut. (siornatigut eqitaat D-usimasoq)

**Eqimattat 6:** Meeqqat illugiinnik pilersuisullit, taakkunanga ataaseq suliffeqarluni imaluunniit ilinnartuulluni. (siornatigut eqitaat E-usimasoq)

**Eqimattat 7:** meeqqat illugiinnik pilersuisullit allallu, suliffeqanngitsunik imaluunniit ilinniagaqanngitsunik angajoqqaallit. (siornatigut eqitaat F-usimasoq)

<sup>1</sup> Imm. 33-p akuersissutigineqarpat kiisalu siunnersuummitut ataatsimoortut katinneqarnissaat pillugu inassut Naalackersuisut malippassuk.

<sup>2</sup> Inatsisip atuuttup allangortinnissaanut siunnersuutip suliarinerani Naalackersuisut peqquneqarput allannguutit kimillit kisiisa ilanngutissagaat. Pingaarnersuilluni tullerriaarinermi oqaasertaliornersinnaasut atussagaat Naalackersuisut peqquneqanngillat.

**4.2 pingaarnersuinermi allattorsimaffik pillugu naalackersuisut oqallinnerusimasut**

Siunnersuutip matuma siullermeerneqarnerani Naalackersuisut ima allannguutissatut siunnersuuteqarput:

*Inatsisartunut 2020-mi ukiakkut ataatsimiinnermi nassuiaammik saqqummiussinissaq siunertaralugu, Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni § 9, imm. 1-imi tulleriissaarisarnermik aalajangersakkat nalilerneqarnissaannik Naalackersuisut peqqunneqarnissaannik siunnersuut.*

UKA2016-imi Kultureqarnermut, Ilinniartitaanermut Ilisimatusarnermut Ilageeqarnermullu ataatsimiititaliaq annertuummik isumaliutissiissummik saqqummiussaqqarpoq, taamaalilluni ataatsimiititaliaq allannguutissatut siunnersuuteqarluni taannalu Inatsisartunit isumaqatigiittunit akuerineqarluni. Allannguutissatut siunnersuut ima oqaasertaqarpoq<sup>3</sup>:

*Forslag til Inatsisartutbeslutning om, at Naalackersuisut pålægges at Inatsisartut inatsisaat nr. 16, 3. december 2012-imeersoq tunngavigalugu meeqqanut perorsaanikkut inerikkiartuutaasumik paaqqinnittarfinnik angajoqqaat pisariaqartitaviinik misissuinermik aallartitseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinermi qulaajarneqassapput 1) illoqarfinni/nunaqarfinni neqeroorutit peqareersuni aamma suli peqanngitsuni pisariaqartitsinerit aamma 2) paaqqinninnissamut neqeroorutit atorneqanngitsut iliuuseqarfiginiarneranni kommunit unammilligassaat. Misissuinerup inernerissavaa pitsanngorsaatissamut kaammattuutissanik arlalinnik saqqummiussineq aammalu misissuineq kingusinnerpaamik UPA2018-imi Inatsisartumut saqqummiunneqassaaq (Ataatsimiititaliap erseqqissaanera)*

Ataatsimiititaliap allannguutissatut siunnersuutini ima tunngavilersorpaa:

*” Qulaani taaneqartutut paasissutissanik pissarsiniarneq meeqqanut suli atualinngitsunut perorsaanikkut inerikkiartuutaasumik neqeroorutitini takussutissat ilaminiinnannguarigaat ataatsimiititaliamit erseqqissaatigineqassaaq. Taamaattumillu misissuinerup peqqissaarussamik itinerusumillu ingerlateqqinneqarnissaa pillugu Naalackersuisut kommuninik oqaloqateqarnermik aallartitsinissaannik ataatsimiititaliamit **sakkortuumik** kaammattorneqarput. Tamatumani akileraartartunut*

<sup>3</sup> UKA2016/55

*atuisutut iluaqutaanissaa siunertarineqarluni. Isumaliutissiisummi uani oqaatigineqartutut inerniliussat, qimerluuinerit, oqaaseqaatillu tungavigalugit perorsaanikkut inerikkiartuutaasumik pisariaqartitsinerup eqqortup misissoqqissaarneqarnissaat pisariaqartinneqartut ataatsimiititaliaq isumaqarpoq. Tamanna tunngavigalugu ataatsimiititaliaq ima allannguutissasut siunnersuuteqassaaq: [...]"*

Ulluunerani paaqqinnittarfinni pissutsit assigiinngitsut arlaqartut pillugit kommuninut tamanut apeqquteqarsimanerit tunngavigalugit inerniliinerit tunngavigalugit ataatsimiititaliap allannguutissasut siunnersuutini ilusilersorjaa. Misissuinerup taassuma takutippaa pingaarnersuilluni allattuinermi ingerlatsineq allaffissornikkut unammillernartuusooq taamaallunilu ataatsimiititaliaq allannguutissasut siunnersuuteqarsimalluni.

Qinersisoqartillugu aalajangiinerni qinigaaffiup siuliani aalajangiiffigineqarsimasunut Naalakkersuisunngorlaat pituttugaaneq ajorput. Tamanna tunngavigalugu Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq aalajangersimavoq qinigaaffiup siuliani Naalakkersuisunut peqqussutaasimasut pillugit suliap sumut killinneranik Naalakkersuisunut apeqquteqassalluni ulloq 22. august 2018.

Tamatumunnga Naalakkersuisut ulloq 19. september 2018 ima akissuteqarput:

***“o. UKA16/55 ulluunerani paaqqinnittarfiit pillugit***

*Ilinniartitaanermut Aqutsisoqarfik meeqqat atuarfianni paasissutissanik katersisarnerup assinganik kommunit ulluunerani paaqqinnittarfiini paasissutissanik katersineq aallartissimavaa. Ukioq manna ukioq siulliuvoq (2018) taamatut paasissutissanik Ilinniartitaanermut Aqutsisoqarfiup aallartinnera. Ilinniartitaanermut Aqutsisoqarfiup ukiumi siullermi inassutigaa, ukioq siulleg – ukiutut misileraaffittut – naliliinerussaaq qanoq annertutigisumik taamatut paasissutissanik katersineq pissutsit paasissallugit kissaatigineqartut imaluunniit taamatut iliornerup ulluunerani meeqqanik paaqqinnittarfinni pisariaqartitsinerup misissorneqavinneranut tapertaasinnaanera.“*

2018-imi paasissutissanik katersinissamut Naalakkersuisut allatseqarfiat periusiormalli qinersinerup kingulliup nalaani suliaq aallartinneqarsimasooq ingerlaqqissimanngitsoq tunngavigalugu ataatsimiititaliaq inerniliivoq – imaappooq ukioq taanna nalunaarusiaq naammassineqartussaasoq. Ukiut marluk atorlugit aaqqinniarneqarsimanera ataatsimiititaliamit eqqumiigineqarpoq. Tamatuma saniatigut Inatsisartut piffissarititaata iluani Naalakkersuisuusimasut suliaq naammassinnaaneraat nalorninartinneqarluni.

Qinersinissamik nalunaaruteqarnerup tungaanut siusinnerusukkut suliakkiutigineqarsimasup ineriartornera maannakkut siunnersuutaasup oqaluserineqarnerani apeqqutiginiarlugu ataatsimiititaliaq aalajangersimavoq. Naalackersuisut pisimasunik allaaserinnissimanerat takuneqarsinnaavoq **ilanngussaq 2-mi**. Suli atualinngitsut pillugit paasissutissanik katersiniarsimaneq misissuiniarsimanerlu 2017-imiit 2019-ip tungaanut ingerlasimasutut isumaqarnarpoq assigiinngitsunillu unammilligassartaqarluni, soorlu kommunit nalunaartarsimanninnerat paasissutissanillu katersiniarnermi misissuinermilu sulisussaaleqisarsimaneq. Malitsigisaanik imatut akissuteqarnermi inerniliisoqarpoq:

*” Ilinniartitaanermut Aqutsisoqarfiup piffissami matumani paasissutissat nalunaarutigineqarsimasut atorsinnaanngilai, tatiginartunik tunngaviliisunillu nalilersuinernik suliaqarnernut, suli atualinngitsunut suliassaqarfimmut tunngatillugu, ilaatigut kommuninit nalunaarsuutitik amigartunik nassitsisarneri, kiisalu aamma paasissutissat nassiunneqartartut kukkuneqartarneri pissutigalugit. Tamatumalu saniatigut Ilinniartitaanermut Aqutsisoqarfik aammattaaq isumaqarpoq nalunaarsuutit nassiunneqartartut annertussusaat ilusilersugaanerallu naammattunik paasissutissiisinnaassanngitsut UKA2016/55-imi ujartorneqartut pissutsit, illoqarfinni aamma nunaqarfinni paaqqinnittarfeqarnikkut neqeroorutaasussanik pisariaqartitsinermi unammilligassat eqqarsaatigalugit, inissat paaqqinniffiusussat atorneqanngitsut pillugit paasissutissat katersorneqarsimasut kisiisa tunngavigalugit aqqissuunniassagaanni.”*

[...]

*”Ilinniartitaanermut Aqutsisoqarfiup taamaasilluni nalilerpaa angajoqqaat pisariaqartitsinerannik piviusumik misissuinissaq ineriartuutaasunik neqeroorutinut tunngatillugu, aammalu kommunit inissanik atorneqanngitsunik isumaginnittarneri naammassineqarsinnaanngitsut taamaallaat paasissutissat nalunaarutigineqartartut tunngavigalugit, nalunaarsuiffinniillu paasissutissanik nalilersuinikkut, kisiannili misissuivittut suliarineqartariaqartut, paasissutissanik suli ilassutitik katersinikkut, assersuutigalugu angajoqqaaniit ullumikkut kommunini ulluunerani paaqqinniffissatut neqeroorutitik atuisuunngitsut akornanniit”.*



**4.3 Naalakkersuisut allannguutissat siunnersuutaat**

Siunnersuutip matuma siullermeerneqarnerani Ilinniartitaanermut Kultureqarnermut, Ilageeqarnermut Nunanullu Allanut Naalakkersuisoq ima oqarpoq:

*”Tassami piffissanngorunarpoq tulleriissaarisarnissamik aalajangersakkat pineqartut ullumikkut Nunatsinni ilaqutariit meerartallit minnerunngitsumillu inuiaqatigiit pisariaqartitaannut qanoq naapertuutsiginerisa nalilersoqqinnissaannut.<sup>4</sup>”*

Kommunini ulluunerani paaqqinnittarfinni ulluuneranilu paarsisarfinni tullerisaarisarnerni pingaarnersiuinermi malittarisassat allanngortinneqarnerini peqqissartumik suliarineqarnerata pingaassusaa Naalakkersuisut erseqqissarpaat.

Tamanna tunuliaqutaralugu Naalakkersuisut allannguutissat imatut siunnersuuteqarput:

*”Inatsisartunut 2020-mi ukiakkut ataatsimiinnermi nassuiaammik saqqummiussinissaq siunertaralugu, Meeqqanut suli atualinngitsunut perorsaaniikkut inerikkiartuutaasunik ulluunerani neqeroorutit pillugit Inatsisartut inatsisaanni § 9, imm. 1-imi tulleriissaarisarnermik aalajangersakkat nalilerneqarnissaannik Naalakkersuisut peqqunneqarnissaannik siunnersuut.”*

Ataatsimiititalialli tupigusuutigaa ataatsimiititaliap apeqqutaanut Naalakkersuisut akissuteqarnerminni (ilanngussaq 2) allammata, paasissutissat naammattut pineqarnissaannut misissuinissaq pisariaqartinneqassasoq, soorlu malitsigisaatut tulliuuttumi issuarneqartut:

*”Ilinniartitaanermut Aqutsisoqarfiup taamaasilluni nalilerpaa angajoqqaat pisariaqartitsinerannik piviusumik misissuinissaq inerikkiartuutaasunik neqeroorutinut tunngatillugu, aammalu kommunit inissanik atorneqanngitsunik isumaginnittarneri naammassineqarsinnaanngitsut taamaallaat paasissutissat nalunaarutigineqartartut tunngavigalugit, nalunaarsuiffinniillu paasissutissanik nalilersuinikkut, kisiannili misissuinivittut suliarineqartariaqartut, paasissutissanik suli ilassutinik katersinikkut, assersuutigalugu angajoqqaaniit ullumikkut kommunini ulluunerani paaqqinniffissat neqeroorutinik atuisuunngitsut akornanniit.”*  
[...]

***Akissut:** Naalakkersuisut naliliipput kommunit nalunaarusiarisartagaat naammattunik paasissutissiisimanngitsut, UKA2019/33+53-ip*

<sup>4</sup> Siullermeerinninnermi akissuteqaat (UKA19/33, UKA19/53), Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq

*kingunerisassaanik qulaajaaniarnermut inatsimmi allannguutissat  
kissaatigineqartut eqqarsaatigalugit. Suli atualinngitsunut  
suliassa qarfirmi tulleriiaarisarnerit misissuiffigineqarneranni  
pissusissamisoortumik ilaassapput kommunit utaqqisunut  
nalunaarsuiffinnik, ulluunerani paaqqinnittarfeqarnermilu inissanik  
inuttaqanngitsunik passussisarneri, ilassuseqqinneqarsinnaallutillu  
misissuinernek kommunini ulluunerani paaqqinnittarfeqarnikkut  
sinerissatsinni illoqarfinni nunaqarfinnilu inissatigut  
kinguaroorutaasimasinnaasut eqqarsaatigalugit.*

(Ataatsimiititaliap erseqqissaanera)

Naliliinermut sanilliullugu misissuineq annertunerullunilu itinerussasoq ataatsimiititaliamit paasineqarpoq. Taamaammat ataatsimiititaliap tupaallaatigaa, allannguutissatut siunnersuummik Naalakkersuisut saqqummiussaqarniarmata, tassani Naalakkersuisut misissuinerunngitsumik nalileeqquneqarmata.

#### **4.4 Kommunit tusarniaaffigineqarnerat**

Kommunit tamarmik immikkut tusarniaanermut allakkamik tigusaqarsimapput, aalajangiiffigisassatut siunnersuutit tamaasa aammalu Naalakkersuisut allannguutissatut siunnersuutaannut oqaaseqaqqullugit inanneqarlutik. Pingaarnersiulluni allattukkanut allannguutissatut siunnersuutitut kiisalu pingaarnersiulluni aalajangersakkat nalilersorneqarneranut Naalakkersuisut allannguutissatut siunnersuutaannut. Kommunit tusarniaanermi akissutaannik misissuinerup ersersippaa kommunit tallimat assigiinngitsunik nangaassuteqarlutik isumaqartut.

Kommunit pingasut (Kommuneqarfik Sermersooq, Kommune Qeqertalik aamma Avannaata Kommunia) eqimattat pioreersut C aamma D ataatsimut katinneqarnissaat ersarissumik tapersorsorpaat. Tassalu UPA2020/33 akuersissutigineqassasoq. Angajoqqaat immikkoortunut marlunnut avinneqarsimasut assigiimmik atugassaqaartut tunngavilersuutigineqarpoq, tassalu arlaalluunniit angerlarsimaffimmi meeqqamik paarsinissamut periarfissaqanngitsut.

Imm. 33-p tunngavilersorneqarnerani eqimattat E aamma F ataatsimut katinneqarnissaat Kommuneqarfik Sermersuup tapersorsoraa illuatungaani Avannaata Kommuniata taamatut allannguut tapersinngilaa. Eqimattat taakku marluk assigiinngitsunik atugassaqaarnerat Avannaata Kommuniata tunngavilersuummini oqaatigaa, angajoqqaat eqimattat E-miittut meeraq angerlarsimaffimmini paarinissaanut periarfissaqarmata.

UPA2020/53 pineqartillugu Kalaallit Nunaata avataani ilinniarsimasut Kalaallillu Nunaanni ilinniarsimasut akornanni assigiinngisitsineqassanngitsoq Avannaata Kommunia isumaqarpoq.

Eqimattat nutaat aallaaviatigut eqqunneqarnissaat pitsaasutut Kommuneqarfik Sermersuumit nalilerneqarpoq. Taamaattorli killeqassasoq kommuni isumaqarpoq, tassa piffissap aalajangersimasup iluani salliutinneqarneq anguneqartarluni – assersuutigalugu ilinniarnep naammassineqarnerata kingorna qaammatit 6-it qaangiunnerisigut. Taamaalluni Kommuneqarfik Sermersooq isumaqanngilaq ilinniartut taamaattut maannakkut eqimattat A-miittunit siullinneqartassasut (meeqqat immikkut perorsaanikkut pisariaqartitsisut imaluunniit pissutsinit allaanerusunik meeqqap ineriartorneranik ulorianartorsiortitsisinnaasunik atugallit).

Naalakkersuisut allannguutissatut siunnersuutaat Kommune Kujallip aamma Avannaata Kommuniata tapersersorpaat. Pingaarnersiulluni allattorsimaffik pillugu aalajangersakkap 1978-imili allangorsimanginnera Avannaata Kommuniata tunngavilersuummini oqaatigaa.

Immikkoortut ataasiakkaat Qeqqata kommuniata ersarissumik isummerfiginngilai, kisiannili pingaarnersiulluni allattorsimaffiup immikkoortuisa allangortinneqarnissaat isumaqataaffigalugu.

**Tabel 2: Siunnersuutit kommuninit tapersersorneqartut nalunaarsuutaat**

	Imm. 33	Imm. 53	Naalakkersuisut allannguutissatut siunnersuutaat
Kommuneqarfik Sermersooq	X <sup>5</sup>	X <sup>6</sup>	
Avannaata Kommunia	X		X
Kommune Kujalleq			X
Kommune Qeqertalik	X		
Qeqqata Kommunia <sup>7</sup>			

<sup>5</sup> Kommunip siunnersuut tapersersorpaa, eqimattat E aamma F ataatsimut katinneqassasut (allataq nr. 1)

<sup>6</sup> Kommunip taavaa imm. 53 ”akuerineqarsinnaasoq” angajoqqaat Kalaallit Nunaannut uterneranni meerartaasa massakkorluinnaq paaqqinnittarfimmi pisariaqartitsisunut salliutinneqannginnissaat, aammalu ilinniarnep naammassineqarnerata kingorna ilinniartutut salliutinneqarnissamik ilimagisaqarsinnaaneq killilerneqarneratigut.

<sup>7</sup>Allannguutissatut siunnersuut imaluunniit immikkoortut ataasiakkaat Kommunip ersarissumik isummerfiginngilai.

#### **4.5 Siunnersuutit ataatsimiititaliamit oqaluuserineqarnerat**

Tullerriiarilluni allattorsimaffiit arlaatigut allanngortinneqarnissaannik kommunit kissaateqarnerat ataatsimiititaliamit maluginiarneqarpoq takuuk **nalunaarsuut 2.** Tusarniaanermi akissutit tiguneqartut aallaavigalugit, kommunit pingaarnertut inatsisip nalilersoqqinneqarnissaa kissaatigigaat ataatsimiititaliap paasiniarpaa. Ataatsimiititaliallu paasiniarpaa Naalakkersuisut allannguutissatut siunnersuutaannut tamanna tapersersuinerusq.

Tullerriiarilluni allattorsimaffiit pillugit suliaq sivisuumik ingerlasimavoq, Naalakkersuisut peqquneqarsimmamata paaqqinnittarfinnut neqeroorutit ilaatillugit kommunit unammilligaat misissorneqassasut (UKA2016/55). Suliap naammassineqarsimannginnera ataatsimiititaliap naammaginangitsutut isigaa. Naalakkersuisut ataatsimiititaliamut akissuteqarnerminni isumaliutissiissummi matumani unammillernartut pillugit ilisimatitsisimannginnerat ataatsimiititaliap eqqarsarnartoqartippaa. Ataatsimiititaliap soorunami ilisimavaa tamatuma qinigaaffimmi allami pisimanera, taamaakkaluartorli suliaq Inatsisartut Naalakkersuisunut suliakkiutaat piffissaliunneqarsimasup iluani naammassineqartussaavoq.

Tamatuma saniatigut ataatsimiititaliamit erseqqissaatigineqarpoq, ulluunerani paaqqinnittarfinnut ulluuneranilu paarsisartunut inissanik agguasarneq pillugu tullerriiarinermi malittarisassat kommunit suleqatigilluinnarlugit ingerlanneqartassasut. Tamatumani immikkoortortaqrarfiit ulluinnarni tullerriiarisarneq pillugu suliallit aalajangersakkat pillugit unamminartut misilittakkallu ingerlateqqinneqartarnissaat qulakkeerniarlugu. Taamaaliornikkut inatsit pisut tunngavigalugit nutarterneqassagaluarpat atugassat pitsaanerpaqqullugit.

#### **5. Siunnersuutip aningaasatigut kingunerisassai**

Aaljangiiffigisassatut siunnersuutip piviusunngortinneqarnerani aningaasaqarnikkut allaffisornikkullu kingunissat siunnersuummut tunngavilersuutini alaaserineqassasut Inatsisartut suleriaasianni § 33, imm. 1-imi allassimavoq.

#### **UPA2020/33**

Ataatsimiititaliap maluginiarpaa tamanna naapertorlugu siunnersuummik piviusunngortitsinermi aningaasaqarnikkut kingunissat siunnersuummi allaaserinneqarsimasut. Taamaalilluni siunnersuummik piviusunngortitsineq, nutserneqarnera aamma tusarniaaneq ilanngullugit atorfilittap ukiup affaata aningaasarsiaatut annertutigisunik atuiffiussasoq nalilerneqarpoq, tassa 250.000 kr-inik.

#### **UPA2020/53**

Ataatsimiititaliap maluginiarpaa tamanna naapertorlugu siunnersuummik piviusunngortitsinermi aningaasaqarnikkut kingunissat siunnersuummi allaaserinneqarsimasut.

Taamaalilluni siunnersuummik piviusunngortitsineq, nutserneqarnera aamma tusarniaaneq ilanngullugit atorfilittap ukiup affaata aningaasarsiaatut annertutigisunik atuiffiussasoq nalilerneqarpoq, tassa 250.000 kr-inik.

## **6. Ataatsimiititaliap inassuteqaatai**

Siunnersuut aamma allannguutissatut siunnersuut pillugit ataatsimiititaliap naggataagut ima oqaaseqarfigissavai:

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit inatsimmi pingaarnersiulluni aalajangersakkat kommunit unammillernartoqarsimapput. Naak aalajangiiffigisassatut siunnersuummut aammalu allannguutissatut siunnersuummut kommunit assigiinngitsunik nalunaaruteqaraluartut, aalajangersagaq misissorneqartariaqartoq ataatsimiititaliamut ersarippoq. Naalakkersuisut allannguutissatut siunnersuutaata ataatsimiititaliallu apequtaasa akornanni isumaqatigiinngitsoqarnera ataatsimiititaliamit maluginiarneqarmat ataatsimiititaliaq allannguutissatut siunnersuuteqassaaq imatut:

**Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni §9 imm. 1 utaqquisut allattorsimaffiat pillugu aalajangersakkanik<sup>8</sup> Naalakkersuisut nalilersueqqullugit peqquneqarnissaannik Inatsisartut aalajangiiffigisassaattut siunnersuut. Nalilersuinermi aalajangersakkat maannakkut atuuttut pissusissamisut ingerlanersut ilaatigut nalilersorneqassapput, Naalakkersuisut suleqatigiinnissaq siunertaralugu kommunit attavigissavai. Nalilersuinerup inernera upernaakkut 2021-imi Inatsisartut ataatsimiinneranni saqqummiunneqassaaq.**

Ataatsimiititaliap **isumaqatigiittup** inassutigaa **Ataatsimiititaliap allannguutissatut siunnersuutaat akuersissutigineqassasoq.**

---

<sup>8</sup> Inatsisartut inatsisaat nr. 16, 3. december 2012-meersoq

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.




Doris Jakobsen Jensen  
Siulittaasoq




Peter Olsen  
Siulittaasup tullia



Erik Jensen



Nivi Olsen



Sofia Geisler



INATSISARTUT

Ilinniartitaanermut, Kultureqarnermut,  
Ilisimatusarnermut Nunanullu Allanut  
Naalakkersuisoq

[lkin@nanog.gl](mailto:lkin@nanog.gl)

Ulloq: 21-10-2019

J.nr.: 01.39.01.03-00222

### UKA2019/33 aamma UKA2019/53 pillugit allakkatigut apeqqutit

Siunnersuutit siullermeerneqarnerinut atatillugu UKA2019/33 aamma UKA2019/53 Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliamut innersuullugit suliaassanngortinneqarput. Siunnersuutit suliarineranni apeqqutit tulliuuttut Naalakkersuisumut nassiuutissallugit ataatsimiititaliap pisariaqartissimavai:

Siunnersuutip siullermeerneqarnerani Naalakkersuisut imatut allannguutissatut siunnersuuteqarput:

*Inatsisartunut 2020-mi ukiakkut ataatsimiinnermi nassuiaammik saqqummiussinissaq siunertaralugu, Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni § 9, imm. 1-imi tulleriissaarisarnermik aalajangersakkat nalilerneqarnissaannik Naalakkersuisut peqqunneqarnissaannik siunnersuut.*

UKA2016-imi Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq annertuumik imalimmik isumaliutissiisummik tunniussaqaqpoq, tassani ataatsimiititaliaq allannguutissatut siunnersuuteqarluni Inatsisartunit isumaqatigiittunit akuersissutigineqartumik. Allannguutissatut siunnersuut imatut imaqaqpoq:

*Inatsisartut inatsisaat nr. 16, 3. december 2012-imeersoq tunngavigalugu meeqqanut perorsaanikkut inerikkiartuutaasunik paaqqinnittarfinnik angajoqqaat pisariaqartitaviinik misissuinermik aallartitseqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut. Misissuinermi qulaajarneqassapput 1) illoqarfinni/nunaqarfinni neqeroorutininik peqareersuni aamma suli peqanngitsuni pisariaqartitsinerit aamma 2) paaqqinninnissamut neqeroorutit atorneqanngitsut iliuseqarfiginiarneranni kommunit unammilligassaat. Misissuinerup inernerissavaa pitsanngorsaatissanut kaammattuutissanik arlalinnik saqqummiussineq aammalu misissuineq kingusinnerpaamik UPA2018-imi Inatsisartunut saqqummiunneqassaaq.*

Ataatsimiititaliap allannguutissatut siunnersuutini ima tunngavilersorpaa:

*” Qulaani taaneqartutut paasissutissanik pissarsiniarneq meeqqanut suli atualinngitsunut perorsaanikkut inerikkiartuutaasumik neqeroorutini takussutissat ilaminiinnannguarigaat ataatsimiititaliamit erseqqissaatigineqassaaq. Taamaattumillu misissuinerup peqqissaarussamik itinerusumillu ingerlateqqinneqarnissaa pillugu Naalakkersuisut kommuninik oqalocateqarnermik aallartitsinissaannik ataatsimiititaliamit sakkortuumik kaammattorneqarput. Tamatumani akileraartartunut atuisutut iluaqutaanissaa siunertarineqarluni. Isumaliutissiisummi uani oqaatigineqartutut inerniliussat, qimerluinerit, oqaaseqaatillu tungavigalugit perorsaanikkut inerikkiartuutaasumik pisariaqartitsinerup eqqortup misissoqqissaarneqarnissaat pisariaqartinneqartut ataatsimiititaliaq isumaqarpoq.*

*Inatsisartut inatsisaat nr. 16, 3. december 2012-meersuni § 4 tunngavigalugu meeqqanut suli atualinngitsunut perorsaanikkut inerikkiartuutaasumik neqeroorutinit pingaarnertut akisussaasut tassaapput Naalakkersuisut. Tamatumani ulluunerani paaqqinnittarfiit aamma angerlarsimaffinni paarsisartut kommunini ingerlatsinerup ataaniikkaluarpataluunniit, (ilaatigut paaqqinnittarfiit namminersortut pinnagit). Tamanna tunngavigalugu ataatsimiititaliaq ima allannguutissasut siunnersuuteqassaaq: [...]*”

Taamaasilluni ataatsimiititaliap inerniliinermini ilaatigut ulluunerani paaqqinnittarfiit pillugit nunatsinni kommuniinut tamanut apeqqutigisimasai tunngavigalugit ataatsimiititaliap allannguutissatut siunnersuummik ilusiliivoq.

Qulaani suliap pineqartup killiffia attatiinnarsinnaaneralu pillugit ulloq 22. august 2018 ataatsimiititaliaq Naalakkersuisunut apeqqutinik saqqummiussisimavoq. Tassungalu Naalakkersuisut ulloq 19. september 2018 akissuteqarsimapput imaattumik:

**” o. UKA16/55 ulluunerani paaqqinnittarfiit pillugit**

*Ilinniartitaanermut Aqutsisoqarfik meeqqat atuarfianni paasissutissanik katersisarnerup assinganik kommunit ulluunerani paaqqinnittarfiini paasissutissanik katersineq aallartissimavaa. Ukioq manna ukioq siulliuvoq (2018) taamatut paasissutissanik Ilinniartitaanermut Aqutsisoqarfiup aallartinnera. Ilinniartitaanermut Aqutsisoqarfiup ukiumi siullermi inassutigaa, ukioq siulleg – ukiutut misileraaffittut – naliliinerussaaq qanoq annertutigisumik taamatut paasissutissanik katersineq pissutsit paasissallugit kissaatigineqartut imaluunniit taamatut iliornerup ulluunerani meeqqanik paaqqinnittarfinni pisariaqartitsinerup misissorneqavinneranut tapertaasinnaanera.”*

1. UKA2016/55-ip akuersissutigineqarneranut atatillugu Naalakkersuisut peqquneqarsimapput suliareqqullugu, tassungalu suliap ingerlasimaneranut killiffik, qanga suliap aallartinneqarpa, paasissutissat pissarsiarineqareersimasut, kommunit allallu attuumassutillit il.il. ilaatinneqarnerat pillugit aalajangersimasumik nassuiaqquneqarpoq.




2. Taamatullu paasissutissat qulaani pineqartut katersorneqarsimasut UKA2016/55-imut ataatsimiititaliap allannguutissatut siunnersuutanik suliaqaqqinnermi qanoq ilaatinniarneqarnersut Naalakkersuisunit nassuiaqquneqarpoq.
3. Qulaani issuaaneq innersuussutigalugu UKA2019/33+53-imi allannguutissatut siunnersuummut taaneqartumut Naalakkersuisut suliamik aallartitserersimanerat pillugu Naalakkersuisut nassuiaateqaqquneqarput.

Naalakkersuisut akissuteqaataat kalaallisut danskisullu allassimasoq ataatsimiititaliamit qilanaarineqarpoq, taannalu qarasaasiakkut [ina@ina.gl](mailto:ina@ina.gl)-mut nassiateqquneqarpoq assilineqarnera ataatsimiititaliap allattaanut [rfr@ina.gl](mailto:rfr@ina.gl)-mut ilanngullugu.

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq sinnerlugu

Inussiarnersumik inuulluaqqusillunga



Doris Jakobsen Jensen

Ataatsimiititaliamut siulittaasoq



## Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq

### UKA2019/33 aamma UKA2019/53 suli atualingitsut pillugit

Kultureqarnermut, Ilinniartitaanermut, Ilisimatusarnermut Ilageeqarnermullu  
ataatsimiititaliaq qutsavigaara allaganngorlugit apeqquteqaataannut, UKA2019/33  
aamma UKA2019/53 pillugit. Apeqqutit uani ataani akissuteqarfigineqassapput.

05-11-2019  
Sagsnr. 2019 - 20588  
Dok. nr. 11657659

Postboks 1610  
3900 Nuuk  
Tlf: +299 34 50 00  
Fax: +299 32 54 33  
Email:

1. UKA2016/55-ip akuersissutigineqarneranut atatillugu Naalakkersuisut peqquneqarsimapput suliaeqqullugu, tassungalu suliap ingerlasimaneranut killiffik, qanga suliaq aallartinneqarpa, paasissutissat pissarsiarineqareersimasut, kommunit allallu attuumassutillit il.il. ilaatinneqarnerat pillugit aalajangersimasumik nassuiaqquneqarpoq.

**Akissut:** Ilinniartitaanermut Aqutsisoqarfiup 2017 aammalu 2018-ip ilaat atorsimavaa skemat kommuniniit suli atualingitsut pillugit paasissutissanik nalunaarsuisarnermi atorineqartussat ineriartortinnerannut. Nalunaarsuisarnermi atorineqartussat skemat taakkua suliarineqarput kommunini ulluunerani paaqqinnittarfeqarnermut suliaqartut suleqatigalugit.

Suli atualingitsut pillugit paasissutissanik katersuineq siulleg suliaqarfimmut tunngatillugu suliaasoq 2018-ip ukiaani ingerlanneqarpoq, piffissaliisoqarluni nalunaarsuutit nassiunneqarsimassasut 1. oktober 2018. Skemat nalunaarsuiffissat misilinneqarnerat taanna siulleg iluatsippallaanngitsutut oqaatigisariaqarpoq, tassami paaqqinnittarfiit affaanit amerlanerulaaginnartut Ilinniartitaanermut Aqutsisoqarfimmut nalunaarutissaminnik nassiussimmata. Paaqqinnittarfinnit 112-iusunit Ilinniartitaanermut Aqutsisoqarfiup taamaallaat nalunaarusiat 61-it tiguai, taakkunangalu 21-it kukkuneqarlutik. Paaqqinnittarfiillu 51 nalunaarusiassaminnik nassiussingisaannarlutik.

Paasissutissanik katersisarneq aamma suliaqartarneq nukittorsarumallugu Ilinniartitaanermut Aqutsisoqarfiup marloriarluni kisitsisinut paasissutissanut tunngatillugu siunnersortitut atorfik inuttassarsiuuttaraluarpa, ajoraluartumilli piginnaanernik pisariaqartunik pigisaqartunik qinnuteqartoqanngilaq. Tamatumalu ilaatigut kingunerisimavaa ajornakusoorsimammat ingerlatsiviit nalunaarusiassaminnik 1. oktober 2018 nassiussaqqanngitsut malersoqqinniarneqarnerat.

Taamaattoq Ilinniartitaanermut Aqutsisoqarfiup iluatsissimavaa vikar-imik atorfinittisinnaq, paasissutissanik katersinermi ikiuttussamik. Ilinniartitaanermut Aqutsisoqarfillu tassuuna suliniuteqarpoq paaqqinnittarfiit suli 2019-imut nalunaarsuutunik nassiussaqqarsimannngitsut pillugit malersoqqitassat naammassinianerannik.

Ulloq manna tikillugu nalunaarusiat 2018-imi piffissap taamaalineranut sanilliullugit amerlanerulaartut tiguneqareersimapput, kisiannili suli suliaassaavoq 2019-imi

nalunaarsuutit kingullit pissarsiarinissaat. Ilinniartitaanermut Aqutsisoqarfiup sap. ak. 39-imi sulianut allanut atatillugu kommunini fagchef-it aamma perorsaanermut siunnersortit / ataqatigiissaarisut ulluunerani paaqqinnittarfeqarnermut tunngasuni ataatsimeeqatigisimavai. Ataatsimiinnermi aamma oqallisigineqarput 1. oktober nalunaarutissat, erseqqissaatigineqarlunilu qanoq pingaartigisoq taakkua Ilinniartitaanermut Aqutsisoqarfimmut nassiunneqartarnissaat.

Ilanngullugulu aamma ilisimatitsissutigineqassaaq Naalakkersuisut Periusissiaannut aamma iliuisissanut pilersaarusiaannut atatillugu, ulluunerani paaqqinnittarfeqarnermi sammisassat tallimaanni, suliniuteqarfiit pingajuanniittut suliarineqarneranut atatillugu suliarineqartussaasoq paasissutissanik katersisarnermut nalilersuisarnermullu pilersaarusiaq, inatsisillornermit suliassat atortuulersinneqarnissaannut atatillugu. Suliamut tamatumunnga pilersaarusiaq suliaavoq Epinion suleqatigalugu. Kingornagullu suliassat allassimaffiat suliassat ingerlateqqinneqarnissaannut atatillugu suliarineqartussaavoq, tamatumalu kingunerissallugu Ilinniartitaanermut Aqutsisoqarfimmi skemap nalunaarusiortarnermi atorneqartup iluaarsiissuteqarfigineqarnissaa annertusineqarnissaalu, suliassaqarfinnik arlaqartunik ilassusikkamik.

- 2. Taamatullu paasissutissat qulaani pineqartut katersorneqarsimasut UKA2016/55-imit ataatsimiititaliap allannguutissatut siunnersuutaanik suliaqaqqinnermi qanoq ilaattinniarneqarnersut Naalakkersuisunit nassuiaqquneqarpoq.*

**Akissut:** Ilinniartitaanermut Aqutsisoqarfiup piffissami matumani paasissutissat nalunaarutigineqarsimasut atorsinnaangilai, tatiginartunik tunngaviliisunillu nalilersuinernik suliaqarnermut, suli atualinngitsunut suliassaqarfimmut tunngatillugu, ilaatigut kommuninit nalunaarsuutunik amigartunik nassitsisarneri, kiisalu aamma paasissutissat nassiunneqartartut kukkuneqartarneri pissutigalugit. Tamatumalu saniatigut Ilinniartitaanermut Aqutsisoqarfik aammattaaq isumaqarpoq nalunaarsuutit nassiunneqartartut annertussusaat ilusilersugaanerallu naammattunik paasissutissiisnaassanngitsut UKA2016/55-imi ujarorneqartut pissutsit, illoqarfinni aamma nunaqarfinni paaqqinnittarfeqarnikkut neqeroorutaasussanik pisariaqartitsineri unammilligassat eqqarsaatigalugit, inissat paaqqinniffiusussat atorneqanngitsut pillugit paasissutissat katersorneqarsimasut kisiisa tunngavigalugit aaqjissuunniassagaanni.

Ilinniartitaanermut Aqutsisoqarfiup taamaasilluni nalilerpaa angajoqqaat pisariaqartitsinerannik piviusumik misissuinissaq inerikkiartuutaasunik neqeroorutinut tunngatillugu, aammalu kommunit inissanik atorneqanngitsunik isumaginnittarneri naammassineqarsinnaanngitsut taamaallaat paasissutissat nalunaarutigineqartartut tunngavigalugit, nalunaarsuiffinniillu paasissutissanik nalilersuinikkut, kisiannili misissuinivittut suliarineqartariaqartut, paasissutissanik suli ilassutunik katersinikkut, assersuutigalugu angajoqqaaniit ullumikkut kommunini ulluunerani paaqqinniffissatut neqeroorutinik atuisuunngitsut akornanniit.

- 3. Qulaani issuaaneq innersuussutigalugu UKA2019/33+53-imi allannguutissatut siunnersuummut taaneqartumut Naalakkersuisut suliamik aallartitsereersimanerat pillugu Naalakkersuisut nassuiaateqaqquneqarput.*

**Akissut:** Naalakkersuisut naliliipput kommunit nalunaarusiarisartagaat naammattunik paasissutissiisimangitsut, UKA2019/33+53-ip kingunerisassaanik qulaajaaniarnermut inatsimmi allannguutissat kissaatigineqartut eqqarsaatigalugit. Suli atualinngitsunut

suliassaqarfimmi tulleriarisarnert misissuiffiqineqarneranni pissusissamisoortumik  
ilaassapput kommunit utaqqisunut nalunaarsuiffinnik, ulluunerani  
paaqqinnittarfeqarnermilu inissanik inuttaqanngitsunik passussisarneri,  
ilassuseqqinneqarsinnaallutillu misissuinernik kommunini ulluunerani  
paaqqinnittarfeqarnikkut sinerissatsinni illoqarfinni nunaqarfinnilu inissatigut  
kinguartoorutaasimasinnaasut eqqarsaatigalugit.

Inussiarnersumik inuulluaqqusilluta

Med venlig hilsen

  
Ane Lone Bagger